

豫章叢書

第六冊

自序

文章之精絕者一代不數人而一人不數篇余自春秋傳訖歐蘇氏拔其尤得七十有九首蓋千載之英華萃矣時同于弟朋友吟諷之善哉今而後有過予陋巷而聞軒縣者必是編也夫洎祐壬寅春東澗書

梅邊集目錄

生祭文丞相文

望祭文丞相文

祭架閣楊秋山

修吉安府廳記

處靜堂記

張縣尉舊祠堂記

彭母湯氏復明事記

贈晏表背序

上參政姚牧庵書

擬再上參政姚牧庵書

贅謝疊山啟

回青山趙儀可慰書

戴石玉字說

戴正傳齋號說

沁園春

出宋遺民錄

梅邊集補

送右衛教授劉一清北上序

先父槐坡居士先母劉氏孺人事狀

梅邊集目錄終

梅邊集

宋安福王炎午撰

生祭文丞相文

丞相再執就義未聞豪傑之見固難測識因
與劉堯舉對牀感愴共賦嗟惜之堯舉先賦
曰天留中子繼孤竹誰向西山飮伯夷問其
下句義則謂伯夷久而不死必有飮之者矣
予謂向字尙有憂其饑而願人餉之之意請
改作在字如何堯舉然之予以寂寥短章不
足以用吾情遂不復賦蓋丞相初起兵僕嘗

赴公召進狂言有曰願明公復毀家產供給
軍餉以倡士民助義之心請購淮卒參錯戎
行以訓江廣烏合之眾他所議論狂斐尤多
慷慨慙愚丞相嘉納委帥機何見山進之幕
府授職從戎僕以身在太學父沒未葬母病
危殆屬以時艱恐進難盡忠退復虧孝倖僥
感泣控辭丞相憐而從之獎拔之公許養之
私丞相兩盡矣僕於國恩爲已負於丞相之
德則未報遂作生祭丞相文以速丞相之死
堯舉讀之流涕相與謄錄數十本自贛至洪

于驛途水步山牆店壁貼之冀丞相經從一
見雖不自揣量亦求不負此心耳堯舉名應
鳳黃甲科第授建康軍判簽與其兄堯咨文
章超卓爲安成名士

維年月日里學生舊太學觀化齋生王鼎翁謹採西
山之薇酌汨羅之水哭祭于丞相文山先生未死之
靈而言曰嗚呼大丞相可死矣文章鄒魯科甲郊祁
斯文不朽可死喪父受公卿祖奠之榮奉母極東南
迎養之樂爲子孝可死二十而巍科四十而將相功
名事業可死仗義勤王受命不辱不負所學可死華

元踰躡子胥脫走丞相自叙者幾死者數矣誠有不幸則國事未定臣節未明今鞠躬盡瘁則諸葛矣保捍閩廣則田單卽墨矣倡義勇出則顏平原申包胥矣雖舉事卒無所成而大節已無媿所欠一死耳奈何再執涉月踰時就義寂寥論者驚惜豈丞相尙欲脫去耶尙欲有爲耶或以不屈爲心而以不死爲事耶抑舊主尙在未忍棄捐耶果欲脫去耶夫伏橋于厠舍之後投筑于目矐之餘于是希再縱求再生則二子爲不知矣尙欲有所爲耶識時務者在俊傑昔以東南全勢不能解襄樊之圍今以亡國一夫而欲抗

天下況趙孤蹈海楚懷入關商非昔日之頑周無未
獻之地南北之勢既合天人之際可知彼齊廢齊興
楚亡楚復皆兩國相當之勢而國君大臣固無恙耳
今時勢無可爲而國君大臣皆爲執矣臣子之于君
父臨大節決大難事可爲則相意忍死以就義必不
幸則仗大節以明分故身執則勇于就義當以臬卿
張巡諸子爲正李陵降矣而曰欲有爲且思刎頸以
見志其言誠僞旣不可知况形拘勢禁不及爲者十
常八九惟不刎頸豈足以見志向使李陵降後死他
故則頸且不及刎志何自明哉丞相之不爲陵不待

知者而信奈何慷慨遲回日久月積志消氣餒不陵
亦陵豈不惜哉欲不屈而不死耶惟蘇子卿可漢室
方隆子卿使耳非有興復事也非有抗師讐也丞相
何俟降與死當有分矣李光弼討史思明方戰納刃
于鞬曰夫戰危事也吾位三公不可辱于賊萬一不
利當自刎李存勗伐梁梁帝朱友貞謂近臣皇甫麟
曰晉吾世讐也不可俟彼刀鋸卿可盡我命麟于是
哀泣加刃於帝而亦自刎今丞相以三公之位兼睚
眦之讐投機明辨豈堪在李光弼朱友貞之下乎屈
且不保況不屈乎丞相不死當有死丞相者矣自死

者義也死于勢死于人以怒罵爲烈死于怒罵則肝
腦腎腸有不忍言者矣雖湯鑊刀鋸烈士不辭苟可
就義以歸全豈不因忠而成孝事在目睫丞相何所
俟乎以舊主尙在未忍棄捐耶李昇纂楊行密之業
遷其子孫于海陵嚴兵守之至男女自爲匹偶然猶
得不死周世宗征淮南下詔撫安楊氏子孫李昇驚
疑盡殺其族夫撫安本以爲德而反以速禍幾微一
失可不懼哉蜀王衍旣歸唐莊宗發三辰之誓全其
宗族未幾信伶人景進之計衍族盡誅幾微之倚伏
可不畏哉夫以趙祖之遇降主天固巧于報德然建

共暫處皓坐苟安舊主正坐于危疑羈臣猶事于骭
麟而聲氣所逼猜嫌必生豈無李昇之疑或有景進
之計則丞相于舊主不足爲情而反爲害矣鼎翁丞
相鄉之晚進士也前成均之弟子員也進而父沒退
而國亡生雖媿陳東報汴之忠死不效陸機入洛之
恥丞相起兵次鄉國時有少年狂子持斐牘叫軍門
丞相察其憂憤而進之憐其親老而退之非僕也耶
痛惟千載之事旣負于前一得之愚敢沒于後破手
啟足非曾參乎得正而斃乃取童子之一言血指慷
慨非南八乎抗義遲回終待張巡之一呼進薄昭之

素服先元亮之輓歌願與丞相商之廬陵非丞相父
母邦乎趙太祖語孟景母曰勿戚戚行遣汝歸蜀景
母曰妾太原人願歸太原不願歸蜀契丹遷晉出帝
及李太后安太妃于建州太后疾亟謂帝曰我死焚
骨送范陽佛寺毋使我爲虜地鬼也安太妃臨卒亦
謂帝曰當焚我爲灰向南颺之庶幾遺魄得返中國
也彼婦人彼國后一死一生尙眷眷故鄉不忍飄棄
仇讐外國況忠臣義士乎人七日不穀則斃自梅嶺
以出縱不得留漢廩而從田橫亦當吐周粟而友孤
竹至父母邦而首丘焉廬陵盛矣科目尊矣丞相忠

烈合爲一傳舊主得老死於降邸宋亡而趙不絕矣
不然或拘囚不死或秋暑冬寒五日不汗爪蒂噴鼻
死溺死畏死排墻死盜賊死毒蛇猛虎死輕一死于
鴻毛虧一簣于泰山而或貽舊主憂縱不斷趙盾之
殺君亦將悔伯仁之由我則鑄錯已無鐵噬臍寧有
口乎嗚呼一節四忠待公而六爲位其間聞訃則哭
望祭文丞相文

相國文公再被執時予嘗爲文生祭之已而
吉水張千載弘毅自燕山持丞相髮與齒歸
嗚呼丞相旣得死矣謹痛哭望奠再致一言

嗚呼扶顛持危文山諸葛相國雖同而公死節倡義
舉勇文山張巡殺身不異而公秉鈞名相烈士合爲
一傳三千年間人不兩見事繆身執義當勇決祭公
速公童子易簣何知天意佑忠憐才留公一死易水
金台乘氣輕命壯士其惑久而不易雪松霜柏嗟哉
文山山高水深難回者天不負者心常山之舌侍中
之血日月韜光山河改色生爲名臣死爲列星不然
勁氣爲風爲霆千將莫邪或寄良冶出世則神入土
不化今夕何夕斗轉河斜中有光芒非公也耶

祭架閣楊秋山

嗚呼秋山我亦人子何用我存而使公死貞元遺士
漸無可悲紛紛年少悲亦無誰道衰俗降士或陷溺
佞舌如飴罵吻生棘公持風裁視之若仇介而能通
和而不流急義如貪範已如傲擇交如矜責善如躁
清修纈密衮筆堂堂文山爲書清修纈密斯人斯筆千載有光
繡衣家聲綵棒初筮姦儔膽落當道羅致南州大隱
涉歷清班載家而往攜影獨還庾梅誓隱蜀四遺老
山嘗言吾與陳清溪楊鱣堂某四人皆蜀人亂公不
前俱仕嶺南旣臣附後出到梅嶺誓不復仕公不
負梅三子則否退修初服奇字雄文子厚之屈子厚
之伸師道陵遲以術廢義欺其父兄交其子弟公嚴

已分憂其無成及門高第雜遝縉紳予初識公聚散
草草三年城西爾汝傾倒高談今古細覈經術聽雨
良宵看花晴日重來問病亟往問安證危食少忍淚
盤桓奸凶庸瑣朝病夕愈乃如之人一疾千古家有
遺書庭有佳兒桐鄉之葬桐鄉之思力疾哭公亦自
哭止噉公不應視天如水

修吉安府廳記

吉爲江右望郡公廨又諸侯所以承流宣化之地士
民所以瞻仰聽政之處非游觀燕集之所比也廢則
建弊則修理之常也郡侯某公近覩廳堂吏舍敝壞